

II - ARABAKO LURRALDE HISTORIKOAREN TOKI ADMINISTRAZIOA

ZUIAKO UDALA

Eugenio Murguia ikerketa bekarako deialdia

Udalbatzak, 2016ko maiatzaren 19ko osoko bilkuran, hau erabaki zuen:

- Zuian 1960. urtetik izandako euskararen berreskurapena ikertzeko 2016ko Eugenio Murguia bekaren deialdia eta oinarri arautzaileak onartzea, ondoren zehazten denaren arabera.
- 2016ko gastuen aurrekontuko 334.480.010 partidaren kontura hornituko da beka hori.
- Deialdia ALHAOn argitaratzea.

Erabaki honen aurka administrazioarekiko auzi errekurtsua aurkeztu ahal izango da Gasteizko administrazioarekiko auzietarako epaitegian, txandaz dagokionean, bi hilabeteko epean, erabakia argitaratu eta hurrengo egunetik aurrera.

Dena den, administrazioarekiko auzi errekurtsua aurkeztu aurretik, aukerako berraztertze errekurtsua aurkeztu ahal izango zaio argitaratzen den esan bidezko ebazpena eman zuen organoari, hilabeteko epean, argitaratu eta hurrengo egunetik aurrera.

Murgia, 2016ko ekainak 17a

Alkate-lehendakaria
UNAI GUTIÉRREZ URKIZA

Zuian 1960. urtetik izandako euskararen berreskurapena ikertzeko 2016ko Eugenio Murguia bekaren deialdia eta oinarri arautzaileak

1. Deialdiaren xedea

Deialdi honen helburua da Zuiako kultura- eta historia-ondareari lotutako ikerketa-proiektuen garapena bultzatzeko beka bat norgehiagoka bidez ematea. 2016ko ekitaldirako beka honen zenbatekoa 6.000,00 eurokoa da, eta xede duen ikerketa-lana Zuian 1960. urtetik izan den euskararen berreskurapenean oinarrituko da.

Beka ikerlari bati edo ikerlari talde bati eman ahal izango zaio. Ikerlari talde bati emanaz gero, era solidarioan beteko dira bekadunek udalarekin izango dituzten betebeharrak.

2. Onuradunak

2.1 Bekak lortzeko, beharrezkoa da:

a) 2015eko urtarrilaren 1a baino lehenagotik erroldatuta egotea etengabe EAeko zeinahi herritan

b) Goi mailako titulua edo lizentzia izatea, hobe bekaren azterlanarekin zerikusia duena bada, edo proiektuaren helburuaren arloan curriculum esanguratsua izatea edo eskatzailearen ikerketa proiektua edo haren jakituria eta proposatutako gaia garatzeko gaitasuna egiaztatzen duen irakasle aditu batek egindako txostena aurkeztea.

Atzerrian lortutako tituluek, edo titulartasun pribatua duten ikastegietakoek, baliozkotzak edo onartuak egon behar dute, bai eta beka ematen diren unean ondorio zibil osoak eduki ere.

2.2 Beka eskuratzen duena ikerlari bik edo gehiagok osatutako talde bat denean, talde horretako ikerlari guztiek bete beharko dituzte aurreko lerroaldean adierazitako betekizunak.

2.3 Beka horietaz baliatzeak ez du esan nahi Zuiako Udalarekin lan harremanik dagoenik, ez eta bekadunak langileen plantillan sartzeko konpromisorik hartu denik ere.

2.4 Bekadunaren programako ikerketa lanak, osorik edo zati bat, Zuiako udal bulegoren batean egin behar badira, jendaurreko ordutegira moldatuko dira.

3. Diruz lagundu daitezkeen proiektuak

Zuian 1960. urtetik izandako euskararen berreskurapenaren inguruan aztertzea xede duten ikerketa-proiektuak jaso ahal izango dute beka, horietara zuzenduta baitago 2016ko ekitaldirako beka-deialdi hau.

Oinarri arau hauek ALHAOn argitaratu eta hurrengo egunetik aurrera hogeita hamar egun izango dira eskaerak aurkezteko.

4. Aurrekontu kreditua

Zuiako Udalaren 2016ko ekitaldiko gastuen aurrekontuko 334.480.010 partidaren, "Eugenio Murguía ikerketa beka" izenekoaren, kontura emango dira bekaren 6.000 euroak.

5. Eskaerak aurkeztea

Eskabideen eta agirien aurkezpena udalaren sarrera erregistroan egin daiteke, edo azaroaren 26ko 30/1992 Legearen, herri administrazioen araubide juridikoaren eta administrazio prozedura erkidearenaren, 38.4 artikuluan adierazten diren bideetako edozeinez baliatuz.

Oinarri arau hauek ALHAOn argitaratu eta hurrengo egunetik aurrera hogeita hamar egun izango dira eskaerak aurkezteko.

Dirulaguntza hauek jasotzeko eskabideak aurkezteak berekin dakar oinarri hauetan ezarritakoa formalki eta espresuki onartzea.

6. Agiriak

Eskabide ofiziala eta inprimakia (udalak emango ditu).

Eskatzaileek gehienez ere hamar egun izango dituzte nabaritutako akatsakzuzentzeko eta, horrela ez egitekotan, eskabideari uko egiten zaiola ulertuko da, izapide gehiagorik gabe. Hala ere, behar den bezala justifikatutako arrazoiengatik, luzatu ahal izango da epe hori.

Abenduaren 13ko 15/1999 Lege Organikoan, datu pertsonalen babesari buruzkoan, xedatutakoa betetzeko, erakunde eskatzaileei ohartarazten zaie aurkeztutako agirietan emandako datuak oinarri hauek arautzen duten deialdiko urteroko dirulaguntzak emateko prozeduran bakarrik erabiliko direla.

Bi gutun azal itxi aurkeztuko dira; bataren aurrealdean A letra jarriko da eta bestearenean B letra. Era berean, landuko den proiektuaren izena eta "Eugenio Murguía Ikerketa Beka" erreferentzia ere idatziko da haietan.

A gutun azalean agiri hauek sartuko dira:

1. NANaren fotokopia
2. Eskatzailearen curriculum vitae.
3. Eskatutako tituluaren fotokopia konpultsatua edo irakasle aditu batek, proiektua babestuz, egindako txostena edo abala.

4. Errolda ziurtagiria.

B gutun azalean landuko den gaiari buruzko proiektua aurkeztuko da. Proiektu horrek, gehienez, Din A4 neurriko 10 folio izango ditu, alde batetik idatzita.

7. Dirulaguntzak emateko irizpideak

Egindako eskaerak aintzakotzat hartu ahal izateko, horiek oso osorik beteta egongo dira, eta udalak eskatutako agiri guztiak aurkeztuko dira, haietako bakoitzaren zertzelada guztiak zehaztu ahal izatearren.

Informazio Batzordeak izango du izapidetzeko eskumena, eta batzorde horrek aztertuko ditu aurkeztutako eskaerak. Dena den, batzorde horrek aholkua eska diezaieke adituei, hala nahi izanez gero.

Balorazioa ondoko irizpideen arabera egingo da:

1. Proiektua egiteko interesa (70 puntu). Kontuan izango da proiektuak euskararen berreskuratze-prozesuan eragina izan ahal duela eta Zuiako udalerrriaren historia eta ondarea hobeto ezagutzen laguntzen duela.

2. Eskatzailearen curriculum vitae (30 puntu).

Eskatzaileek, beka jaso ahal izateko, 100 puntutik 60, gutxienez, lortu beharko dituzte.

Batzordeak, egoki irizten badio, kanpoko adituen txostenak edo aholkularitza teknikoak eska ditzake aurkeztutako proiektuak ebaluatzeko.

Batzorde horrek beka eman gabe uzteko eska dezake, aurkeztutako eskaerak ikusi eta gero.

Bateraezintasunagatik, absentziagatik edo uko egin izanagatik ordezkorik hautatu behar bada, batzordeak zerrenda osatuko du beka eskatu dutenenekin, eta lehentasunen arabera antolatuko du hura.

Zuiako Udalak, egoki irizten dion kasuetan, aurkeztutako agiriei buruzko datuak eta azalpenak eskatzeko ahalmena izango du. Espedientea atzeratu, eta are artxibatu ere egin daiteke, baldin eta datu nahiz azalpen horiek ez badira bideratzen azaroaren 26ko 30/1992 Legeak, herri administrazioen araubide juridiko eta administrazio prozedura erkidearenak, urtarrilaren 13ko 4/1999 Legearen bidez aldatuak, ezarritako epeetan.

Batzordeak txosten bat egingo du, deialdian ezarritako irizpideen arabera aurkeztutako eskaerak erkatu ondoren, eta bertan, egindako ebaluazioaren emaitza eta eskaeren lehentasun hurrenkera zehaztuko da, hala badagokio.

Eskatzaileari ez zaio entzunaldiko izapiderik eskainiko, ebazpenean eskatzaileak aurkeztutako gertaerak eta agiriak besterik ez direlako aintzat hartu.

Organo eskudunak bidezko ebazpena emango du; horretarako, gehienez ere, bi hilabeteko epea izango du deialdia ALHAOn argitaratzen denetik. Epea igaro eta esanbidezko ebazpenik eman ez bada, interesdunek ezetsizat jo ahal izango dute eskaera.

Esleipen ebazpenean zer eskatzaileari eman zaion dirulaguntza zehaztu behar da, eta berariaz adierazi behar da gainerako eskaerak ezetsi direla.

Ebazpenean datu hauek agertuko dira, baiezkoa bada: bekaren zenbatekoa, ordaintzeko modua, laguntzaren xede den programa edo proiektua, aurkeztu beharreko agiriak eta bete beharreko baldintzak. Gainera, onuradunei jakinaraziko zaie, azaroaren 26ko 30/1992 Legeak, herri administrazioen araubide juridikoaren eta administrazio prozedura erkidearenak, 59. artikuluan ezarritakoarekin bat etorriz (urtarrilaren 13ko 4/1999 Legeak finkatutako Testua).

Herri administrazioen araubide juridikoaren eta administrazio prozedura erkidearen Legeak 59. artikuluan xedatutako moduetan jakinaraziko zaie eskatzaileidirlaguntza eman ala ukatu zaien.

Ebazpenak administrazio bidea agortzen du; beraz, uztailaren 13ko 29/1998 Legearen, administrazioarekiko auzibideetarako jurisdikzioa arautzen duenaren, 9.c) artikulua xedatutakoaren ildotik, haren aurka administrazioarekiko auzi errekurtsua aurkez daiteke, administrazio auzietarako epaitegi nagusietan. Horretarako bi hilabete izango dira, ebazpena jakinarazten denetik aurrera.

Zuzenean aurkatu ezean, errekurtsua aurkeztu ahalko zaio ebazpena eman zuen organo berari, hilabeteko epean, azaroaren 26ko 30/1992 Legeak, herri administrazioen araubide juridikoaren eta administrazio prozedura erkidearenak, urtarrilaren 13ko 4/1999 Legearen idazkeran, 116. eta 117. artikuluetan xedatutakoarekin bat etorriz.

Zuiako Udalak deialdia garatzeko bidezko diren ebazpenak emango ditu, eta behar diren ekintzak egin ahalko ditu onuradunei datuak eskatzeko, eta ziurtatzeko aurkeztutako datuak egiazkoak direla eta oinarrietan araututakoa bete dela. Horretarako, onuradunak behartuta daude Zuiako Udalak eskatzen dizkien datuak eta agiriak, hau da, egindako jardueri buruzko datuak eta agiriak, aurkeztera.

8. Dirulaguntza ordaintzea

Esleitutako bekaren ordainketa bi emanalditan egingo da, ondoren azaltzen den moduan:

a) Bekaren zenbatekoaren ehuneko 50, laguntza esleitzen den unetik aurrera. Aurreratutako diru hori zuritu egin beharko da.

b) Gainerako ehuneko 50a, lana bukatutakoan, oinarri hauetan zehazten den memoria edo egindako lana aurkeztu ondoren. Memoria edo lan hori euskaraz eta gaztelaniaz aurkeztuko da. Lana udalean aurkeztuko da, bai paperean bai euskarri digitalean.

c) Batzorde eskudunak oniritzia emandakoan.

9. Bekadunaren betebeharrak

Azaroaren 17ko 38/2003 Lege Orokorrak, dirulaguntzenak, 14. artikuluan eta uztailaren 21eko 887/2006 Errege Dekretuak, lege orokor horren arautegia onartzen duenak, xedatutako beteko dute bekadunek.

Beka eskuratzeko eskaerak aurkezteak oinarri hauetako arauak berariaz eta baldintzarik gabe onartzen direla esan nahi du.

Proiektuaren memoria aurkezteko epea 2016ko abenduaren 31n bukatuko da. Memoria udalaren sarrera erregistroan aurkeztuko da, edo azaroaren 26ko 30/1992 Legearen, herri administrazioen araubide juridikoaren eta administrazio prozedura erkidearenaren, 38.4 artikuluan adierazten diren bideetako edozeinez baliatuz.

Dirulaguntza jasotzeak berekin izango du deialdi honetan ezarritako xedapenak bete behar izatea, bai eta laguntzak eta dirulaguntzak emateko prozedura arautzen duen udal ordenantzan agindutakoa ere. Hain zuzen ere, eskatzaileari gogorarazten zaio derrigorrezkoa dela Zuiako Udalaren babesa aipatzea diruz lagundutako jarduera sustatzeko elementuetan eta horren inguruan egiten diren karteletan, idazkietan edo dokumentuetan. Elementu horiek guztiak EAEko bi hizkuntza ofizialetan editatu beharko dira.

Onuradunek deialdi honen bidez emandako dirulaguntzak gal ditzakete, aurrez espedientea irekita, ondoko kasuetan:

– Aurkeztutako eskaera eta agirietan datu faltsuak jarri badira.

– Dokumentazioa aurkezteko epea amaitutakoan, berariaz eskatuta aurkezteko, aurkezten ez bada.

– Oro har, oinarri hauetan edo dirulaguntza ematen duen erabakian ezarritako betebeharrretako bat betetzen ez bada.

– Dirulaguntza galduz gero, itzuli egingo da jasotako dirua, Zuiako Udalaren kontura transferentzia eginez. Onuradun batek eskatzen zaion kopurua bere borondatez itzultzen ez badu, ezin izango du udalaren inolako dirulaguntzarik jaso; udalak zenbatekoak eskuratu ahal izango ditu.

10. Dirulaguntzen bateragarritasuna

Beka hau ezin da beste beka batekin batera gozatu, ezta edozein erakunde edo korporazio zein pertsona publiko edo pribaturekin bekadunak hitzarmen edo estatutu lotura izanda soldatarik edo lansaririk kobratu ere, Zuiako Udalak horren berri ez badauka eta horretarako berariazko baimenik eman ez badu.

11. Laguntza itzultzea

Era berean, jasotako dirulaguntzak itzuli egin beharko dira 3/1997 Foru Arauak, Arabako Lurralde Historikoko dirulaguntzei eta transferentziei buruzkoak, azaroaren 17ko 38/2003 Lege Orokorrak, dirulaguntzenak, eta uztailaren 21eko 887/2006 Errege Dekretuak - azaroaren 17ko 38/2003 Lege Orokorren arautegia, dirulaguntzena, onartzekoa- xedatzen dituzten egoeretan.

Onartutako diru-laguntza dela-eta jasotako diru zenbatekoak itzuli behar izatekotan, zuzenbide publikoko diru-sarrerak direla ulertuko da eta dagokion araudian aurreikusitakoaren arabera kobratuko dira

12. Interpretazioa

Oinarri hauen interpretazioan sortzen diren zalantzak alkateak ebatziko ditu, informazio batzordeak eta dagokien teknikariek aurrez txostena eginda.

13. Lanen jabetza

Zuiako Udalarena izango da aurkeztutako proiektua, eta ezinbestekoa izango da haren baimena hura kopiatu edo argitaratzeko.

Edonola ere, deialdia egin duen erakundeak ez du inolako betebeharririk izango beken onuradunenganako, aipatutako lanak argitaratu edo erakusteagatik.

14. Arau hausteak eta zehapenak

Dirulaguntzak direla eta, administrazioko arau hauste izango dira Dirulaguntzak eta Laguntzak arautzen dituen Ordenantza Orokorreko IV. kapituluan jasotako egite edo ez-egiteak.

15. Legeria gehigarria

Oinarri hauetan xedatu ez den guztian, Zuiako Udalaren dirulaguntzak eta laguntzak arautzen dituen ordenantza orokorrean eta dirulaguntzen lege orokorrean eta horren arautegian xedatutakoa hartuko da kontuan.